

山海經圖讚
雲南山川志

山海經補註
雲緬山川志



雲
緬
山
川
志

李榮陞
撰

中
華
書
局

叢書集成初編

山海經圖讚（及其他三種）

中華書局出版發行

（北京王府井大街三十六號）

秦皇島市資料印刷廠印刷

一九九一年北京第一版

開本：七八七乘一〇九二毫米三十二分之二

統一書號：ISBN 7-101-00894-1/K·367

此據問影樓輿地
叢書本排印初編
各叢書僅有此本

雲緬山川志

清 萬載李榮陞撰

山

雲緬來山。與南內幹同祖於大崑崙山。東行至蘭滄江尾。分幹南行。亦謂之大雪山。出番界。入雲南大抵。西逼潞江。東逼蘭滄。布勢不遠。至永昌。而漸廣其體。東畝爲羅岷山。入順寧。滇遊記云。其山分三支。西南及直南下者。俱短。惟東南一支。挾蘭滄而東。爲都魯山。復分支焉。潞江東去者。爲右甸。爲順寧雲州諸山。而直南下者。爲枯柯嶺。則分水之脊是也。枯柯嶺東南行。度草房哨。枯柯街在四右甸城在北。又南爲杜偉山。嶙峋獨聳。小橋村在東。區峒在西。東南爲萬岷山。入雲州界。東連飛鶴山。過其磴。色木槽在南。丫口在北。折而北。屏峙爲黑馬塘。東北穿大凹。頭道水在西。水鎮關在東。東南行爲長坡嶺。爲芹菜塘。爲蠻賴山。爲連乃山。登爲接天山。大猛聯山在東。賴寧在西。入緬寧界。西南行爲南掌箐。爲南岷山。西轉南。爲大雀山。接猛猛界矣。其去路東南逕耿馬。孟連。孟艮。八百。安南。占城。而絕於漲海。今撫其幹枝之在境內者。志焉。萬岷山在州西南順寧界上。東連飛鶴山。叢峰高秀。山北水爲草堪河。下流附蘭滄入南海。山南水爲盤河。下流附潞江入西南海。萬里蠻龍之脊。不特雲緬宗之而已。黑馬塘山。其脈西北自萬岷來。南馳爲懸膽箐。檀木嶺。張腊山。乾坡。而盡於盤口。北馳爲昆奔。爲猛麼。而

盡於下衛。要之一山也。橫亘二三百里。黑馬以南。其巔夷坦。深樹冥冥。行者仰不見日。身在三四十里上。以爲谷底也。猛麼植州南。南河外。與大雀山對峙。自州右望之。如人字。山半平敞。爲數村。居人多豐其屋。優游暇豫。如地行仙焉。有明時土州奉敕與弟學不相能。而出居。學據其上游。以弟故人以下衛。目之。長坡。其脈西南自黑馬塘來。伏於頭道箐。而東起爲長坡。北轉爲獨木箐。邦谷箐。黃草埧。盡於獐扎。其西麓所派爲疊培箐。爲荷花海子。爲田心村。爲草皮街。爲丙票瘴海子。托體甚高。至海所。四山轉平。藕花不種而茂。人傳其內有潛物焉。田心村。據兩湖之會。地平曠。有微瘴。少人居。瘴海廣僅十數畝。皆汙萊。三月間。吐烟成綫。人不敢徑其湯。海西卽玉案山。隔河與官署對。

蠻賴山。其脈西自長坡來。經南安蠻。況轉而北。合沓高空。馳八九十里。而盡於昆業。與阿輪南北相望。順甸河。一大關也。巔皆老箐。無人到。在城東六七十里。滇志誤移於城西。府志失載。雲人莫知其名。然此山南鄰威信。北跨永平。大平諸里。其所隸諸村。猶存蠻蠻蠻徠之名。故知其在此耳。

述乃山。其脈西北自蠻賴來。東南繞緬寧。而轉爲龍潭山。述乃山。官房箐山。聯延百里。實接天山之脈也。山之東水入南麻。其西水入南丁。

接天山。滇志云。在府南三百里。猛麼東界。多積雪。府志云。雪山在雲州城東南二百里。猛麼境。其巔有平區。自然隴畝高下。蔥韭羅生。又有石門石室。遊者時值之。予聞邦東人云。山半以上無人居。惟緬僧歲一扳登。採異花以供佛。山之西。卽緬寧境。蓋雪山卽接天矣。而府志遺其名。別于西粵山下。注云。前有梳頭

山左爲偏邦山。右爲胡孫山。今按此三山皆在緬寧。而西粵則縣隔順寧之西。彼此不相應。殆誤以雪山爲西粵也。蠻龍經行雲緬。此山爲高麓。西千里乃屆潞江。而東麓距蘭滄纔百里。體殊偏曲。然布勢益廣矣。

南掌山一名南箐。其脈東北自雪山來。橫抱緬村。東南而抵于廟山。隔河與錫本相錯。箐柱層鬱。不見天。披登中凹。北望城大僅如孟平田千百頃。圍其外。裔疆所稀見也。山中皆夷巢。刻木以升。無南北。入從旁戶。男女環躍而寢。其下牛豕居之。彼此不爲垣。與之語。重譯乃通。蓋其食無稻。衣無帛。無甲子之紀。宗支之係。度世冥冥。然前古之風。略具此矣。

南們山其脈自南掌東北來。橫帶緬南。亦謂之分水嶺。南丁源其北。折而西南。入於潞。護蒜源其南。折而東。入于蘭滄。

南岷山在西南猛猛界上。東與南們連體。而分脈北行。越空掠遠。緬西諸山皆其分派也。滇志謂猛緬西南界。有山高六十里者。惟此可以當之。然箐勢渺莽。無人徑。不能計其里之實。嘗登箐門。遙望羣峯。崔嵬與南們同。其高尙遜于接天耳。

大雀山在西南猛猛界上。脈自南們北來。繞寧安之東。東支依護蒜而盡其幹。出界東南趨耿馬也。以上正幹

習彌山其脈出于都魯。都魯之山東南行。近順寧城分爲二。其北出者爲倮山。抱城而東。爲樂平山。萬寧

山東南入州境。爲習彌山。府志云。在州北一百五十里。其高千仞。下臨滄江是也。通志謂在城東六十里。殊不應。山之西有龍潭。南流入于順寧河。凡順甸以北。蘭滄以南。諸山皆以此爲祖。

阿輪山脈。西自習彌來。伏爲分水嶺。東起大山嶂。累百餘里。當伏脈處。下去麓猶二十里。則頂之高可知。滇志云。高二千仞。下臨蘭滄。雲地惟此山積雪。府志云。與景東無量山。隔江遙對。其險爲諸山之冠。予嘗於江外山巔。玩夾江形勢。皆連嶺造天。此山尤冥然不測。所極殆欲傑出無量之上。志所稱不虛矣。沿山諸里。爲遵化僧戶。歸化土人。率據其所。分聚落如椹木林之類。名之。無有知阿輪者。惟分水巔南下有哨名挨羅。卽阿輪之轉音。前人設專哨在其間。其後分爲大平林後。而阿輪乃降居一隅。猶順寧三台山哨。亦以分多降居西路。今志猶云。三台去山頂十里。正此類也。然彼猶存三台之號。此則併本音而亦訛。名實是非之眞。誰從辨之。山在城東北百二十里。諸志脫北字。

天馬山脈。北自習彌來。過蠻冒山。山南挺爲天馬。新城依其東麓。其西卽順寧境萬峯山。隔澗而臨之。山距城纔五里。土人以其最近。故爲之。美名。然在雲諸山中。不爲高。滇志云。如天馬騰空。登其巔。山川形勝無遺。乃臆說也。府志別出鎮彝山。馬鞍山。益贅。

猛卯山。其脈北出於蠻冒。東行南折。爲猛卯。長廣與天馬同而稍高。新城在其西麓。水外兩山之間。頗有平甸。故明人改流時。建城於山。然遠山高而風不透。近山淺而泉不滋。瘴所以難祛也。山雖峻而無石。嵐昏土湧。草木焦然。志乃云。形如列戟。蒼翠欲流。褒之非其實。不受矣。

璣岳山。其脈與府治北之僕山同祖而分支。南行爲鬱密山。立斯基山。璣岳山。山東南入州境。其勢北連把邊。南連大雀。西面延屬數百里。通貫爲一。不可窮其道里。而東盡於州之舊城。自州治沿脊行。一日可達。山半有呂祖閣。疊花庵。及鹿塘銀井。皆老管阻絕。山之巔。時有雪映旭而色赤。故受璣名。兩腋水派爲南北河。其近州者。北爲阿直谷。南爲丙布谷。居人長翳霧雨。惟秋霽見曦焉。

象山。出於璣岳之中枝。直行十里。而橫延如象。南尾而北首。官署民居。廟壇墓市之屬。皆憑之。右肋有乾海子。其水東流入於南河。

大雀山脈。自璣頂南劈爲冷水箐。逶迤而東爲大雀。其巔有盤石。可坐數十人。岩洞錯列於下。拽脈東行爲銜珠箐。環嶺如大城。一峯正鎗其戶。亦幽居之選也。東伏再起爲丙布峯。自南橋西望。衆山皆偃。惟此人立於高空。

八刺山。其脈西自蠻賴來。北抵順甸。東盡蘭洽。長六七十里。龍馬塘在其上。八刺土音爲吧喇。今轉爲波羅矣。山在城南八十里。滇志誤爲十里。府志失載。夫府載其所屬。宜詳於省。而疏脫如此。其於省志亦未之寓目也。

東山。其脈西北自蠻賴山分背而南行。爲陶幹山。習宜山。白水巖。東山盡於南引河口。府志云。習宜山有泉。岩水自其端溯洄而下。如銀絲映空。十餘里外。即望見之。下有白水村。又云。猛麻寨。東山上有龍潭。方廣清深。前明世酋女逃兵亂。於此遇害。酋哀其志。構庵於巖側。衛之。其地絕險。僧無以自給。久而遂墟。

昆陸山其脈西出於雪山東岸於江其地三面臨水有潭在頂上櫛而曲兩端漸欹如人目江水清渾潭輒應之故土人目爲江眼焉山之南卽緬寧境

邦東山雪山東麓也北與猛麻八道箐連氣多平田古樹清流怪石村落周通行者快其坦迤然下距地面二十里矣已上正幹之左支水入關道江者

西粵山滇志云山皆峭壁有瓊英洞廣十餘丈上浮翠蓋如垂蓮深邃莫窮府志云在府南一百六十里阿度吾里懸崖數十丈流乳爲纓絡鈎鉤如笋如芝石刻爲瓊英洞天山之泉匯其中四五里爲池盈畝水沉碧時見巨蟹大如屋人莫敢近猛會常道人秉炬極探之穿出山後箐中花木秀異阻水而返其山在猛緬界今按緬之西接壤州之猛賴猛回與順非毗鄰惟州之猛底西連阿度吾西粵山應在其界然予未之到其山水分合不能懸悉附記於此俟後之好遊者

緬山東與猛麻官房箐連氣其水西入南丁滇志云在猛緬西北高二十五里二猛往來徑於此

鳳凰山其脈西自南岷來東北行數十里盡於南角水內緬寧城據餘坡之上山橫如鳥布翅故名東麓有溫湯在丁河曲硫烟漫白緬會之所營山西有八仙洞大小相涵爲房室曲透有石牕天成俯臨箐頂會歲於蘇暑時簪待年之女薪其下視愜意者以銀椀聘焉洞外營庵守之今並蕪廢

梳頭山與鳳凰山分脈於南岷而外轉東行盡於城西南角水外山高而多腳略如梳形故以名今土人別號其南小山爲獅頭者形亦肖然此山東臨平甸與雪山遙對滇志謂在緬西南誤也

美木山其脈亦出南岷而北行過箐門左分邦帕右分遮乃又北爲美木山西與雲州蠻鳥連氣皆老箐蟠結紅娘子樹出其中也蠻鳥箐其脈南自緬寧箐門來入州南境爲蠻鳥箐蠻乃箐上下張龍箐北抵丁河之曲其分蠻鳥而南出者歷昆康而盡於猛回西南出者歷象扒而抵於邦紅皆縱橫輻輳入瘴益深。

蠻彌山滇志云在城南一百五十里以問州人無知者審其里向得之西南界上其山西北爲順寧西南爲鎮康耿馬東北卽州猛底也耿馬人名爲猛止州人稱爲漫母語音輕重之差耳南丁河帶其東南志乃云濱蘭滄江殊誤予嘗登緬寧箐門山霜天晴徹遠嶺疊橫望此山猶帶長雲其尖殆合於霄漢也土人云北起右甸南極南丁綿亘數百里與景東蒙樂山相似故亦名無量以上正幹之右支水入潞江者。

筆架山在蘭滄江東景東界上南內幹東行至雲南縣分幹右出爲定西嶺南東行至蒙化景東爲蒙樂山山分支西南行過景谷山猛戛山又西南爲筆架山入緬寧胡蚌村依其麓。

蠻茂山其脈自筆架山東分而南轉西行連延爲蠻茂山有村依其南麓。

貫衆山在緬寧東南偶乃泊河側距城二百里其山分界三郡東北景東東南威遠西北緬寧筆架之委也以上南內幹之分支。

所舉雲南通志乾隆年所修順寧府志乾隆二十年所修其或藉於辭而窒於義亦隨文刪改然不致失其意諸志具可按也。

川

滇遊記云。雲州東界蘭滄江。西界潞江。按雲西爲潯甸鎮。康潞江猶在外。然西南有南丁河。亦其水之左支也。蘭滄西洱。唐人有名黑水者。宋程大昌直指爲禹貢黑水。明李元陽益張之源。西出蒙番入雲南。南逕大理。順寧。雲州。緬寧。威遠。普洱。折而東。趨老撾。交趾。入於南海。逶迤雲緬境內。幾八百里。而右入之支亦不一。今並志之。

蘭滄江。西北來。離順寧縣境。而水裏兩郡。左蒙化。右雲州。互爲天塹焉。水環州北東二方。從此首入右甸。習彌之山。東南行經神舟渡。

府志云。古渡在下游朝陽寺側。土寇蔣朝臣圍州城。分兵據之。州人潛於此結筏渡。以速援兵。賊駭以爲神。解圍遁。今渡名神舟。以此。

右過丙老河水。繞阿輪山麓。而東經阿古止渡。過習宜水。又東經普明澗渡。至平掌。過了尾水。又東左岸入景東境。經羊街渡。漸轉南。微東行。經溫慎渡。過習騰水。又南經憂舊渡。過蠻槐水。征緬圖。神舟渡下游。有蠻疊江渡。未詳。又南過佑順河口。又南經葉蒲蘆渡。過其水。又南繞龍馬塘麓。過蠻弄水。又南繞波維

山麓。過其水。南經烏言渡。轉東。微南行。繞葛蒲塘麓。過其水。入猛麻境。轉南行。過蠻蚌箐水。征緬圖。其口名蠻白江。邦威水。溫卜水。南繞丙乾山麓。經獼猴渡。過其水。又南過打黑水。又南過麻河口。逕昆睦山之東。又南過那戈水。繞行八道箐。以屬於緬寧。計其長約三百餘里。渡子云。自神舟沿江下。四十里。阿古止。

二十里普明灣。三十里羊街。五十里溫慎。一百二十里憂舊。九十里葉蒲盧。九十里烏言。一百八十里獼猴渡。長幾六百里。江路紆迴。倍於鳥路耳。神舟、羊街、烏言、獼猴。皆官爲船濟行旅。餘五渡。民自爲之。然渡子利過客之錢。率不以聞。頃年奉李制府公文。設卡於神舟。以書役主之。江楚游民之入州者。並禁焉。蘭滄江從緬寧東首入其境。曲折南行至憂里。過上渡。轉而西南。右過那限河。

河西出猛麻界。接天山。山之水四分。西爲緬堡河。北爲那戈河。東爲那限河。那限河左抱邦東山麓。東南入於江。

又西南行。左岸離景東境。全江入於緬寧。西行轉微南。右過蠻槐大水。蚌練水。水並西北出。接天山東南。入於江。

又西南過南掌箐水。至虎措。過下渡。又西南右過蠻頂河。左過沈家砦河。又西南右過等蹇河。那摩河。那笋河。南行左過蠻茂河口。

河東北出景東界分水嶺。西南行。逕上下蠻茂村。過慢丫水。於其左折而西。又收那玉水。那板水。西南入於江。

又西南右過護蒜河口。

河北出於南們山。山西北連體。南岷西南幹所經也。其水東南行。過圈答。又南右合寧安水於大雀山之東。東行過護蒜汛。爲護蒜水入於江。

轉南出緬寧境。入威遠地。其下游轉而東。左過緬寧之乃泊河。直南東西去。

河東北出景東之界。其山北與蠻茂河分水西南行。右過蠻了水。而南。至乃泊。出緬寧境。下游逕威遠入于江。

蘭滄江。自東迤南。斜貫緬中。烏路約二百餘里。

按蘭滄爲黑水之副。中區自江河外。無與絜長者。然在雲緬間。廣率不能半里。逼處萬山。無十丈之平。上下千里。無城郭村落田疇。故無行船。非人不能通。無所用之也。右岸阿輪山。八刺山。接天山。左岸無量山。並連亘。與州司相終始。其高造雲。冬夏雪積山之半。氣清無暑。蒸嵐氤其下。爲毒淫。故邊發瘴尤厲。滇志云。歲五六月。江中有物。色如霜。光如火。聲如析木。破石。謂之瘴母。人觸之則死。又云。起于春末。止于秋杪。岸上草相結爲草頭瘴。時則行旅皆絕。土風凶惡如此。故非其土夷及附近之爲客者。不敢問津焉。

孟佑河。導源府西北右甸之董瓮山。爲右甸河。東南行。合猛佑水。爲孟佑河。繞阿度吾里折而東。右帶萬岷。左帶雪山。納其水。東北由州境西首入。小孤山峙於右。逕昆奔箐東行。左過大雀山。右抱白石崖。過雨溫湯水。北轉過銜珠箐。猛廢箐。又東行。抱下銜廢墟。而下過螃蟹之口。

其水南出頭道箐。黑馬塘山。與昆奔分水。黑馬之泉北流。合衆源。過永鎮關。爲螃蟹河。又北過蠻培水。荷花海子水。水出東山頂。物怪守之。其荷人不敢取。常有盜水蔭田者。雲雷暴起。幾斃山下。其水並墮。

於螃蟹河。又北行過盤槐。左抱下衙村入孟佑河。

又東左過南辛河口。

河一名小龍河。西北出大雪山。過河中村南行。右合冷箐。左合瓊南箐。薄於線天之岩。其口聳壁絕高。有石室翳深木中。又南過擔簦橋。有村內曰布。據南辛之心。田勝一牛平岡。回合可念。其水曲折出山入孟佑河。

東行逕舊城南大侯州。奉氏土城也。亦謂之上衙焉。奉氏有土之始不可詳。萬歷中。兄赦爲況州治。此弟學爲目治下衙。旣而設流官治新城。故曰此爲舊城。河水繞城散爲數汶。南草橋聯其上。謂之南河。其橋舊名新惠。康熙中。州人以鐵索架梁爲之。後圯於水。轉北行。右負玉案山。至鎖水橋閣之左。與順寧河會。其橋明季名砥柱。見於滇遊記。康熙中。知州刁飛龍復成之。更名廣德。以無堅岸亦就圯。

順寧河。導源府城北之臘門箐。東南行。過衙亭橋。桃源水。董永水。自左來會。過迎春橋。右轉趨交鳳山尾。合鑿桑水爲順寧河。南行左帶樂平山。九龍山。右帶鬱密諸山。收其水。南微東行過洛甸河。

河西南出中阿山。東北流至洛黨。入順寧河。

又南過疊花山箐。轉而東。右合於大箐。東南穿把邊山峽以出。又南右過石頭箐。收瓊岳阿苴之水。左合於龍潭。由州境西首入。右繞象山之勢。出舊城北。北草橋跨其上。爲北河。一名南坎河。蓋夷語。不識其義。北河東至鎖水閣之左。入於孟右河。府志複出順寧衙亭。又謂臘門失考。而以洛甸爲洛甸。皆誤。入州境。

亦然。諸水雖土人號爲河，實細流也。近繞城下，志尙昧其首尾分合，況他乎。兩河既合爲順甸河，一名順佑河。東北行，右過黃草埧諸簪，左過新城河口。

河北出猛卯山之首，經丙龍而南，地多沙磧，夏水暴，田輒壞。又南逕新城之東，雲州城也。明萬歷中，改流建州治於此。河水又南過乾海口，海蓄西坡上，廣可十頃，其初水澄深有物潛焉。州人爲樓市其側，航舟以遊賞。後或傳爲龍徙，海漸不盈，城中瘴亦作，而地墟矣。其水下注新城河，又南東入於順甸河。穿其東橋，橋一名富春，雍正知州吳元鑿所修。今僅餘右趾。又東右過北麻河口。

河南出蠻乃大箐，南與南麻河分水。北麻水北流，西帶長坡，黃草埧，東帶猛稿通，爲小猛麻，對南大猛麻，爲名也。箐內支水十數，翕聚成川，北至羅扎地，入順甸河。土人亦目爲羅扎河。

北徽東過猛郎河口

猛郎河，出分水凹，北與丙老河分水，故名。其水南行，繞挨羅哨而東，左會馬四河於會掌村口。又東南帶猛郎街，穿其橋，左合於牛椿之河。河北出阿輪山，南流降於村，有水澆出平地，石穴間，廣圓數畝，其氣上冲如黑霧，半里外硫腥逆鼻，其熱不可探，流稍遠，溫涼平。土人羣以浴，男女異次焉。水側有廟，繞柱龍如生，僧云：常乘風雨出浴，故鎖繫之。其水南附牛椿，而入猛郎河。猛郎河又東，右合溫奔之水。水西出習彌山，蠻冒箐，東行過溫奔，有橋橫其上，四鉅木爲底，長七八丈，覆以石亭，其堅可任數百歲。有楊生者，語予云：州地多浮砂，夏潦攻其岸，橋輒壞，故猛郎之工，新舊相接，然如四木者，亦盡林宅之選。

矣。吁。四木皆大厦材也。而緇爲村杠。以待牛馬之走。又不能保夏潦之丕侵。惜乎。其水東入猛郎河。猛郎河又東折而南。左過蠻著水而甸。入順河。

東南行。左過丙邊河。定喜河。右過昆業河。昆粟河。昆掌河。左水並出阿輪山。檉木嶺。右水並出蠻賴山。犬牙相加。以入於順甸。又東南至漫乃。入於蘭滄江。其水自西境東橫貫雲境。而最紆折。鳥路二百里。江行倍之。總其支派所經。幾半雲地焉。

南麻河。導源州南之蠻乃山。山南與緬寧分水。東有大龍潭。其水東行入猛底境。左合蠻況之水。折而南。繞新街於其右。過蠻速水。新村水。又南右過南滿箐。水曲折行。穿柳樹橋。逕蠻朶蠻挨邦別。而出於司治之東。其地爲上圈。奉氏襲土職於此。四百餘年。下圈繞其外。民戶纔百餘。逼處窮簷。如繁蹈堦。其水東南行。右過南辛河。夾回龍寺。而左轉。與南引河合。

南引河。亦導源蠻乃山。其西與蠻況分水。南引水東南行。右繞陶幹山。左帶菖蒲塘。入猛麻境。折而南。逕錫宜村。白水村。村西大山巔有龍潭。其水東懸流數十丈。並東入於南引河。河又南右過習元河。導源邦別箐。與龍潭相連。懸巖亦高。或回風激吼。雨則旋至。士人以爲候焉。其水東南入南引河。又東南合南麻河。

東入於蘭滄江。鳥路長一百六十里。

南丁河。導源司南之分水嶺。其山西於猛猛分水。故以名南丁。源東北行過其汛。左會猛準水。猛托水於